

आकाशवाणी

खबरां ----

1. प्रधानमंत्री नरेंद्र मोदी होरें आखेआ जे हेल्थ फॉर ऑल यानि सब्बनें लेई स्वास्थ्य उंदी सरकार दे संकल्प 'सबका साथ-सबका विकास' दा इक प्रमुख थम्म ऐ।
2. प्रधानमंत्री मोदी होरें अपने हर म्हीने प्रसारित होने आहले कार्जक्रम 'मन की बात' च आखेआ जे भारत तेजी कन्नै अपनी छाप आर्टिफिशल इंटेलीजेस च छोड़ा करदा ऐ। उनें आखेआ जे दुनिया इस खेत्तर च स्हाढे प्रगति दी तरीफ करा'रदी ऐ।
3. दिल्ली दी 8मीं विधानसभा दा पैहला सत्र कल शुरू होगा। दिल्ली दियां मुखमंत्री रेखा गुप्ता होरें आखेआ जे कैग दी रिपोर्ट पेश करना, औने आहले 3 दिनें दे विधानसभा सत्र दा सब्बनें शा मता जरूरी पैहलू होगा।
4. दिल्ली दियां मुखमंत्री रेखा गुप्ता होरें अज्ज केंद्री गृह मंत्री अमित शाह हुंदे कन्नै नमीं दिल्ली च उन्दे आवास पर मलाटी कीती।
5. आई.सी.सी चैंपियन्स ट्रॉफी च भारत ते पाकिस्तान बश्कार दुबई च ग्रुप-ए मैच च पाकिस्तान नै जित्त लेई भारत गी 242 रन्ज दा लक्ष्य दित्ता।



प्रधानमंत्री नरेंद्र मोदी होरें आखेआ जे हेल्थ फॉर ऑल यानि सब्बनें लेई स्वास्थ्य उंदी सरकार दे संकल्प सबका साथ, सबका विकास दा इक मुख् थम्म ऐ। प्रधानमंत्री होरें अज्ज मध्य प्रदेश दे छतरपुर जिले च बागेश्वर धाम चिकित्सा ते विज्ञान शोध संस्थान दी बुनियाद रखदे होई आखेआ जे स्हाढे मंदर पूजा दे केंद्र दे अलावा विज्ञान ते सामाजिक चेतना दे बी केंद्र ना। मोदी होरें आखेआ जे एहू संस्थान 10 एकड़ च तैयार कीता जाग ते पैहले मरहले च एहूदे च 100 बिस्तरें दी सुविधा मुहैया होग। अज्जै-कल्लै दी मशीनें ते माहिर डाक्टरें कन्नै लैस इस अस्पताल च गरीब गुरबे कैंसर रोगियें गी मुफ्त इलाज मुहैया होग। कैंसर दे इलाज सरबन्धी सरकार दे जत्तें दा जिक्र करदे होई उनें आखेआ जे इस बरे दे बजट च कैंसर कन्नै लड़ने लेई मती सारी घोषणां कीती गेइयां ना। प्रधानमंत्री होरें आखेआ जे अगले 3 बरें च कैंसर दी दोआइयां सस्ती बनाइयां जांगन ते मुल्लखै दे हर जिले च कैंसर दे डे-केयर सेंटर बी खोले जांगन। उनें जिला अस्पताले च कैंसर दे क्लिनिक खोलने दी बी घोषणा कीती। मध्य प्रदेश, बिहार ते असम दी अपनी त्रै दिनी जात्तरा तैहत प्रधानमंत्री होर अज्ज मध्य प्रदेश पुज्जे। ओहू भोपाल च 2 दिनें वैश्विक निवेशक शिखर सम्मेलन 2025 दा बी उद्घाटन करंगन। कल प्रधानमंत्री बिहार दे भागलपुर जांगन।

<><><><><><>

Mann ki Baat

प्रधानमंत्री नरेन्द्र मोदी होरें अज्ज अपने महावार रेडियो कार्यक्रम मन की बात राएं देश विदेस च रौहने आहले लोके कन्ने अपने विचार सांझा कीते। अपने अज्ज आहले सम्बोधन च उनें इक बारी फीहू बक्ख बक्ख विशें पर गल्ल बात कीती। अपने अज्ज दे कार्यक्रम च

उनें इसरो दे हाल दे मिशन बारे गल्ल कीती। उनें आक्खेआ जे पिच्छले म्हीनें इसरो 100में मिशन दा साक्षी बनेआ एह छडा इक नम्बर नेई ऐ सगुआं एदे कन्ने अंतरिक्ष विज्ञान सरबन्धी नित नमिएं उचाईएंगी छूनें दे साहडे कल्प दा पता लग्गदा ऐ। उनें आक्खेआ जे इसरो दी सफलताएं दा दायरा बडा बड्डा ऐ ते पिच्छले 10 बरें च 460 उपग्रहें दा प्रक्षेपण कीता गेआ। इसदे च दुए मुखें दे उपग्रह बी शामिल हे। हाल दे बरें च इस क्षेत्र च महिलाएं दी हिस्सेदारी बी बडी मती बदी ऐ। अपने अज्ज आले मन की बात कार्यक्रम च उनें ओन्दे राष्ट्रीय विज्ञान दिवस बारे बी गल्ल कीती। उनें आक्खेआ जे साहडे बच्चे दा ते युवाएं दा विज्ञान प्रति रुझान होना बडा जरुरी ऐ ते एह बडा गै मायनें रक्खदा ऐ। इसी लेईए उनें अपने इक विचार गी बी सांझा कीता। उनें आक्खेआ जे इक दिन वैज्ञानिक दे तौर पर गुजारिएं दिक्खना लोडचदा। हर कोई अपनी सुविधा मूजब इक दिन चुनी सकदा ऐ ते एसे दिन तुसें गी लैव या स्पैस सेन्टर जनेई जगहें पर जाईए दिक्खना लोडचदा। इयां करने कन्ने विज्ञान प्रति जिज्ञासा होर बढौग। अपने अज्ज आले प्रगोराम च उनें आर्टिफिशल इन्टेलिजेंस दी बी गल्ल कीती। उनें आक्खेआ जे एह इक एसा क्षेत्र ए जेदे च भारत अपनी बक्खरी पन्ध्यान बना र दा ऐ। उनें आक्खेआ जे हाल च गै ओहू इस सरबन्धी सम्मेलन च हिस्सा लैने लेई पैरिस गेदे हे। उत्थे इस क्षेत्र च भारत दी प्रगति दी बडी मती सराहना होई। 8 मार्च गी ओन्दे महिला दिवस बारे गल्ल करदे होई प्रधानमंत्री होरें आक्खेआ जे इस बारी ओहू इस दिन इक एसी पैहल करन जा र दे न जडा साहडी नारि शक्ति गी समर्पित होग। इस खास मौके पर प्रधानमंत्री होर अपने सोशल मीडिया मंच जिया एक्स, इन्स्टाग्राम, एक्आउंटस गी मुख दी प्रेरक महिलाएं गी इक दिन लेई सौपंडन। इस दिन ओहू अपने अनुभव ते अपने कम्मे गी देशवासिएं कन्ने सांझा करडन। प्लेटफार्म बेशक प्रधानमंत्री हुन्दा होग पर इनें मंच पर एह महिला अपने अनुभव,

उपबिधियां, चुनोतियां ते कम्मं गी सब्बनें कन्ने सांझा करडन्ना। राष्ट्रीय खेडें दी गल्ल करदे होई प्रधानमंत्री होरें आक्खेआ जे इनें खेडें च घट्ट उमरी दे बच्चे दा प्रदर्शन हैरान करी देने आह्ला हा। 15 बरें दे निशानेवाज एगविन एंटनी, यूपी दी हैमर श्रो खडारी 16 बरें दी अनुष्का यादव, ते मध्य प्रदेश दे 19 बरें दे पोल वालटर देव कुमार मीणा होरें साबित करी दिता ऐ जे भारत दा खेडें सरबन्धी भविक्ख बडी गै होनहार पीठी दे हत्थें च ऐ। उनें फिट इन्डिया दी बी गल्ल कीती। उनें आक्खेआ जे फिट ते सेहतमंद राष्ट्र बनने आस्तै ओवसिटि दी सनमस्या कन्ने निबडने दी बडी मती लोड ऐ। इक स्टडी मूजब अज्ज 8एंचा इक व्यक्ति इस समस्या करी परेशान ऐ। मता वजन केई सारी समस्याएं गी पैदा करदा ऐ। एदे पर पार पाने दी लोड ऐ। प्रधानमंत्री मोदी होरें दस्सेआ जे कर्नाटक दे बीआरटी बाघ अभ्यारण्य च बाघें दी आबादी लगातार बदा र दी ऐ उनें इसदा श्रय सोलिगा जनजाति गी दिता। एह जनजाति बाघ दी पूजा करदी ऐ। उने गिर च एशियाई शेरें दे संरक्षण आस्तै गुजरात दे लोकें दे योगदान दी बी सराहना कीती। प्रधानमंत्री मोदी होरें आक्खेआ जे इने जतनें करी पिच्छले किश बरें च बाघे, तेंदुएं एशियाई शेरें, गैंडें ते बारहसिंघें दी आबादी तेजिया कन्ने बदा र दी ऐ। उने आक्खेआ जे भारत दा हर हिस्सा, कुदरत प्रति ना छडा संवेदनशील ऐ सगुआं ओह बन्य जीवन दे संरक्षण प्रति वचनबद्ध बी ऐ। अपने संबोधन दे अखीरै च प्रधानमंत्री नरेन्द्र मोदी होरें बोर्ड दे इम्तेहान च हिससा लै र दे परीक्षा योद्धाएं गी शुभकामना दितियां। उने विद्यार्थियें गी आक्खेआ जे ह बिजन कुसै तना दे सकारात्मक भावना कन्ने अपने इम्तेहान देन। मोदी होरें इस गल्ला पर खुशी जाहिर कीती जे परीक्षा पे चर्चा हुन संस्थागत रूप लैन्दी जा'रदी ऐ।

Delhi Assembly

दिल्ली दी 8मीं विधानसभा दा पैहला सत्र कल थमां शुरू होआ'रदा ऐ। दिल्ली विधानसभा सचिवालय पास्सेआ जारी इक सूचना मूजब सत्र दे पैहले रोज नमें चुने गेदे विधायकें गी सगंध चुकाई जाग। एहदे कन्नै कन्नै विधानसभा दे नमें स्पीकर दा चुनाहू बी पैहले रोज गै करोआया जाग।



Delhi CM Assembly

दिल्ली दिआं मुख्मन्त्री रेखा गुप्ता होरें आखेआ ऐ जे कैग दी रिपोर्ट पेश करना कल थमां शुरू होने आहले 3 दिनें दे विधानसभा सत्र दा सब्बनें शा मता जरूरी पैहलू होग। विधायी पार्टी दी बैठक दे बाद इक प्रेस ब्रीफिंग गी संबोधित करदे होई उनें आखेआ जे उद्घाटन विधानसभा सत्र च सब्बै विधायक अपनी सगंध चुक्कडन। उनें आखेआ जे कल स्पीकर ते डिप्टी स्पीकर दे औहदे लेई बी चुनां होडन।



HM Delhi CM

दिल्ली दिआं मुख्मन्त्री रेखा गुप्ता होरें अज्ज केंद्री गृह मंत्री अमित शाह हुंदे नै उन्दे आवास पर मलाटी कीती। सोशल मीडिया पोस्ट च श्री शाह होरें आखेआ जे दिल्ली दे लोकें प्रधानमंत्री नरेंद्र मोदी हुंदे अगुवाई ते जन कल्याणकारी नीतिएं पर मता भरोसा जताया ऐ। उनें आखेआ जे उंदा भरोसा बरकरार रखदे होई रेखा गुप्ता हुंदा मुख्मन्त्री दे

तौरा पर कार्जकाल यकीनी तौरा पर दिल्ली गी नमीं उंचाइयें पर लेई जाग ते लोकें दी आसें-मेदें गी बी पूरा करोग।

<><><><><><>

Chief Army Staff Visits France

सेनाध्यक्ष जनरल उपेंद्र द्विवेदी फ्रांस दी 4 दिनें दी राजकीय जात्तरा पर खाना होई गेन। इस दौरे दा मकसद भारत ते फ्रांस बश्कार रक्षा सहयोग मजबूत करना ऐ। सेनाध्यक्ष कल पेरिस दे बड्डे सैन्य अधिकारियें कन्नै गल्लबात करंगन। ओहू गार्ड ऑफ ऑनर दा निरीक्षण करंगन ते फ्रांस दे सेनाध्यक्ष जनरल पियरे हुंदे कन्नै गल्लबात करंगन।

<><><><><><>

Honduras Aid

भारत नै हाल च गै उष्णकटिबंधीय तूफान सारा दे मद्देनजर होन्दुरस गी 26 टन दी मनुक्ख मदाद भेजी ऐ। विदेश मंत्रालय नै आखेआ ऐ जे इस खेप च मेडिकल सप्लाई ते आपदा राहत सामग्री शामिल ऐ जिंदे च सर्जिकल सप्लाई, ग्लूको मीटर दस्ताने, सिरिंज ते आई.वी तरल पदार्थ, कंबल, स्लीपिंग मैट ते हाईजीन किट्स शामिल ना।

<><><><><><>

Pakistan Release Indian Fishermans

पाकिस्तान नै 22 भारतीय मछेरें गी वापस भेजी दित्ता ऐ। एह अटारी बाघा संयुक्त चेक पोस्ट थमां भारत च दाखल होए। एह मछेरे 2021-22 बरे च मच्छी फगड़दे समें अनजाने च पाकिस्तान दे जल खेत्तर च दाखल होने दौरान पाकिस्तान आसेआ फगड़े गेदहे। सजा पूरी होने दे मगरा उनेंगी वापस भेजेआ गेआ ऐ। इनें मछेरें च 18 गुजरात दे त्रै दीव ते इक उत्तर प्रदेश थमां ना।

<><><><><><>

Radio-Begum Resume

अफगानिस्तान च तालिबान दी रोक हटने दे मगरा इक महिला रेडियो केंद्र कन्नै प्रसारण परतियै शुरू होने दी मेद बज्झी ऐ। रेडियो बेगम नां दे इस केंद्र गी कथित तौरा पर इक विदेशी टी.वी चैनल गी विजन इजाजत दे सामग्री मुहैया करने ते प्रसारण लाइसेंस दे गलत इस्तेमाल दे दोष च बंद करी दित्ता गेआ हा। कल रातीं जारी इक बयान च तालिबान दे सूचना ते संस्कृति मंत्रालय नै घोषणा कीती जे स्टेशन नै अपनी गतिविधियां परतियै शुरू करने दी इजाजत लेई बार-बार गुजारिश कीती ही।

<><><><><><>

Cricket

आई.सी.सी चैंपियन्स ट्रॉफी क्रिकेट टूर्नामेंट दे ग्रुप-ए दे मैच च अज्ज भारत दा मुकाबला पाकिस्तान कन्नै होआ करदा ऐ। भारत नै जित्त लेई 242 रन्ज दे लक्ष्य दा पिच्छा करदे होई अखीरी खबरां थहोने तगर 3 ओवरें च 20 रन्ज बनाई लैते दे हे। दुबई अंतरराष्ट्री क्रिकेट स्टेडियम च अज्ज पाकिस्तान नै टॉस जित्तियै पैहले बल्लेबाजी दा फैसला लैता।

पाकिस्तान नै अपनी पारी च 10 विकेटें दे पर 241 दौड़ां बनाइयां न ते भारत गी जित लेई 242 दा लक्ष्य दित्ता ऐ।

<><><><><><>

Women-Peacekeepers

महिला शांति सैनिकें लेई वैश्विक दक्खन दे सरबंधै च महिलां शांति सैनिकें दी भूमिका विशे पर अपनी चाल्ली दा पैहला-पैहला सम्मेलन कल नमीं दिल्ली च शुरू होग। दऊं दिनें दे इस सम्मेलन दा सरिस्ता विदेश मंत्रालय आसेआ रक्षा मंत्रालय ते संयुक्त राष्ट्र शांति सैन्य केंद्र दे सहयोग कन्नै कीता जा'रदा ऐ। सम्मेलन च वैश्विक दक्खन थमां शांति सेना च योगदान देने आहले 35 मुलखें दिएं महिला शांति सैनिकें दे हिस्सा लैने दी मेद ऐ। विदेश मंत्री डॉक्टर एस जयशंकर होर इस सम्मेलन च मुख भाषण देडन। संयुक्त राष्ट्र दी नुमायंदगी संयुक्त राष्ट्र दे अंडर सैक्रेटरी जनरल जीन पियरे लैक्रोईक्स ते संयुक्त राष्ट्र दे विशेष कोआर्डिनेटर क्रिश्चियन सॉन्डर्स आसेआ कीती जाग। ओह सम्मेलन च शांति रक्षा खेत्तर कन्नै सरबंधत होरनें पक्खें दे कन्नै शामिल होडन। एहदे च हिस्सा लैने आहली महिला शांति सैनिक राष्ट्रपति द्रौपदी मुर्मू हुंदे'नै बी मलाटी करडन।

<><><><><><>

Weather

मौसम विभाग नै आखेआ ऐ जे जम्मू-कश्मीर च कल मौसम आम तौरा पर खुशक रौहगा। उआं 25 थमां लेइयै 28 फरवरी तगर जम्मू-कश्मीर च मौसम दे बदलोडखडा रौहने दे कन्नोकन्नी कई थाहरें पर हल्की थमां दरम्याने दर्जे दी बरखा बरने ते बर्फबारी दी पेशगोई कीती गई ऐ। मैहकमे नै सलाह दित्ती ऐ जे प्रदेश दे कई प्हाड़ी जिलें च शिडकें पर

बर्फबारी करी गड्डियें दी आओजाई पर रोक लाई जाई सकदी ऐ। इंदे च साधना पास, राजधान पास, सोनामर्ग जोजिला, गुमरी एक्सिस, मुगल रोड, सिंथन पास ते होरनें कई प्रमुख शिडकां शामिल ना। इस करियै जात्तियें गी सलाह दिती गेई ऐ जे औहू ट्रेफिक अडवाइजरी दी पालमा करन ते मौसम दे साब्वै गै सफर करन।

<><><><><><>

MoS-Hospitals

केन्द्री राज्य मंत्री डाक्टर जितेन्द्र सिंह होरें खरे इलाज-मुआलजे लेई सरकारी ते गैर-सरकारी अस्पतालें बश्कार बेहतर तालमेल पर जोर दिता ऐ। उ'नें आखेआ ऐ जे आपसी तालमेल दे चलदे गै निजी अस्पताल कामयाब रेहू ना। डॉक्टर सिंह होरें आखेआ ऐ जे केन्द्र सरकार अस्पतालें ते नर्सिंग होम बश्कार सैह्योग गी बढावा देआ करदी ऐ तांजे दूर-दरेडे इलाकें दे लोकें गी बमारियें दी रोकथाम च मदाद मिली सकै। उ'नें एहू गल्ल कल जम्मू-कश्मीर दे अखनूर च नीलकंठ हेल्थ केयर एण्ड हॉस्पिटल दा उद्घाटन करदे होई आखी। डॉक्टर सिंह होरें इब्बी आखेआ जे राश्ट्री जनतांत्रिक गठबंधन-एन.डी.ए. सरकारै देशै च डेढ लक्ख आरोग्य केन्द्र खोले ना। उ'नें दस्सेआ जे आयुष्मान भारत दुनिया दी सब्भनें शा बड्डी सेहत बीमा योजना ऐ।

<><><><><><>